



Krink Ech.

## Handjbal



Bie 't handjalle dao liktj mien hart,  
Det is toch 'n verhaol apart.  
Mien handjbalteam geit promovere,  
Weer hove niks mieë bie te lere !

Miene taegesjtenjer.....dae amatäör !  
Dae doon ich edere kieër get vääör !  
Ummer goaj ich 'm in 't nèt!  
Miene sjpróngworp dae is supervèt !

'ne Wedsjtried hie, 'n training..... jao !  
Es 't geit óm de bal, den bön ich dao !  
Ich druim van goaje mit de bal  
En train tótdet ich d'rbie neerval.

Zelje raak ich de bal nog kwiet!  
En vange dat doon ich altied!  
Ich dribbel hel, höb 'ne sjoane paass,  
Womit ich éééderein verbaas !

Ich wil de verdediging bönnedrènge,  
Ich dribbel en mótt lènks óm sjprènge !  
Ich sprint nao vääre, mit 'ne break....  
Maak 'ne sjpróngworp en goaj 'm deep!

Waat höb ich toch 'ne goje techniek,  
Det hueër ich zoa aan 't publiek !  
Die rope, klappe en sjrieëve hel  
En daodoor ren ich èns zoa snel !

Second dribbel, 'ne time-out...  
Dóórgaon noe! Anges geit 't fout!  
De taegepartie krigs ze gerete !  
Penanty ....! Yes.....! En ich moog sjete !

Noe staon ich oppe zeve-maeter,  
De sjeids reuptj get.....mer uhhh?... Wat zaet d'r ???  
Ich gaon toch door, 'n bietje oet balans...  
Mit 'n sjienbewaeging pak ich mien kans!

Ich sjeet dae bal gans good d'rdoor!  
Maak de allervètste goal, ich scoor!  
Rechop in 't bèd.... is dit noe ech????  
Aohhhh nae! 'ne Druim! Bah, waat 'ne pech!!!

**José Peters-Dewaide.**  
**Echs: Piet Aben.**